

საკონკურსო პირობები

1. ტერმინების განმარტება

- დაპირება** – საქართველოს კანონმდებლობის საფუძველზე, ამ პროგრამით გათვალისწინებული მიზნებისათვის, სამინისტროს მიერ გაცემული დაპირება საცხოვრებელი ფართის შესყიდვის თაობაზე, რომელიც, შეზღუდვის გარეშე მოიცავს შესასყიდი საცხოვრებელი ფართის რაოდენობას (ფართების მითითებით), ჯამურ ფართს, ჯამურ ღირებულებას (1 კვ.მ.-ის ფასის მითითებით) და სამინისტროს მხრიდან ნასყიდობის ღირებულების ანაზღაურების ვადებს და პირობებს.
- დისკვალიფიკაცია** - კომისიის გადაწყვეტილებით მინიჭებული სტატუსი, რომელიც მენაშენეს უზღუდავს კონკურსში შემდგომ მონაწილეობას. დისკვალიფიკაციის საფუძველი შეიძლება იყოს, შეზღუდვის გარეშე, არასრული და/ან ხარვეზიანი დოკუმენტაციის წარმოდგენა, კონკურსის მსვლელობის ნებისმიერ ეტაპზე.
- კონკურსის გამოცხადების თარიღი** - კონკურსის ოფიციალურად და საჯაროდ გამოცხადების თარიღი, რომლიდანაც იწარმოებს მენაშენეთა წინადადებების მიღება, დადგენილი წესით.
- კონკურსის დასრულების ვადა** - კონკურსის პირობებით განსაზღვრული სამუშაო დღე რომლის სამუშაო საათების დასრულების შემდეგ (18.00 თბილისის დროით), შეწყდება სამინისტროს მიერ საკონკურსო წინადადებების მიღება.
- ლოტი** - კონკურსის მონაწილის მიერ, მისი დისკრეციით წარმოდგენილი საცხოვრებელი ფართების ერთობლიობა, რომელთაც, საკონკურსო წინადადების ფარგლებში, აქვთ ერთი და იგივე ფასი და ჩაბარების თარიღი. ლოტში საცხოვრებელი ფართების რაოდენობა შეზღუდული არ არის.
- მენაშენე** - ნებისმიერი ფიზიკური და/ან იურიდიული პირი, რომელიც, საქართველოს კანონმდებლობით დადგენილი წესით, მის საკუთრებაში არსებულ უძრავ ქონებაზე ფლობს მოქმედ მშენებლობის ნებართვას და ამ ნებართვის საფუძველზე დაპროექტებული და/ან დაწყებული და/ან დამთავრებული აქვს მშენებლობა და/ან დასრულებული საცხოვრებელი ფართ(ებ)ი რეგისტრირებული აქვს საკუთრებაში.
- საბოლოო შედეგების გამოცხადება** - კომისიის გადაწყვეტილებით, კონკურსის დაზუსტებული შედეგების საჯაროდ გამოცხადება, გამარჯვებულ(ებ)ის გამოვლენის შემდგომი ტექნიკური მოთხოვნების შესრულების ხარისხზე და შედეგებზე დაყრდნობით.
- საკონკურსო წინადადება** – კონკურსში მონაწილეობის მიღების მიზნით მენაშენის მიერ სამინისტროში წარდგენილი განაცხადი, რომელიც შეიცავს დანართი 3-ის 3.1 (იურიდიული პირებისათვის) ან 3.2-ში (ფიზიკური პირებისათვის), ასევე 3.3-ში (ყველა მონაწილისთვის) მითითებულ ყველა დოკუმენტს.
- სამინისტრო** - საქართველოს ოკუპირებული ტერიტორიებიდან იძულებით გადაადგილებულ პირთა, განსახლებისა და ლტოლვილთა სამინისტრო.
- საცხოვრებელი ფართი** – სამშენებლო დოკუმენტაციით განსაზღვრული და მენაშენის მიერ მშენებლობის დასრულების შემდგომ საჯარო რეესტრში დარეგისტრირებული საცხოვრებელი ფართი, სრულად, რომელიც წარმოადგენდა საკონკურსო წინადადების საგანს და შესაბამისობაში იქნება დანართი 2-ში განსაზღვრულ ტექნიკურ პირობებთან.

11. **ტექნიკური მოთხოვნები** - კომისიის მიერ გამოვლენილი გამარჯვებული საკონკურსო წინადადებების შემდგომი დეტალური შესწავლა-დაზუსტების მიზნით მოთხოვნილი დოკუმენტაცია, რაც, შეზღუდვის გარეშე მოიცავს ტექნიკურ ექსპერტიზას და შესაბამის დასკვნას საქართველოს მთავრობის 2012 წლის 5 სექტემბრის #360 დადგენილებით განსაზღვრული ერთ-ერთი პირის მიერ.
12. **ფინანსირების ზღვარი** - სამინისტროს მიერ დადგენილი, მისი 2015 წლის საბიუჯეტო ასიგნებებიდან კონკურსისათვის გამოყოფილი განსაზღვრული მაქსიმალური მოცულობა. ფინანსირების ზღვარი ამ კონკურსისათვის განსაზღვრულია 16 (თექვსმეტი) მილიონი ლარის ოდენობით.
13. **ფინანსური ინსტიტუტი** - შესაბამისი ლიცენზიის და/ან სერტიფიკატის მფლობელი ქართული თუ უცხოური ფინანსური ინსტიტუტი, რაც მოიცავს კომერციულ და/ან საინვესტიციო ბანკებს, მიკროსაფინანსო ორგანიზაციებს და/ან სადაზღვევო კომპანიებს, რომელთანაც მენაშენეს, ამ პროგრამის ფარგლებში, გაფორმებული აქვს სათანადო ხელშეკრულება.
14. **ფორმულა** - საკონკურსო წინადადებების შესაფასებლად შემუშავებული მათემატიკური წესი, კონკურსის მონაწილის მიერ მითითებული ფასის საცხოვრებელი ფართის ჩაბარების დროსთან მიმართებაში ერთგვაროვნების მიღწევის მიზნით. ფორმულის აღწერა და შინაარსი მითითებულია დანართი 1-ში.
15. **შუალედური შედეგების გამოვლენა** - კომისიის მიერ საკონკურსო წინადადებების განხილვის შედეგად, დანართი 1-ის ფორმულის თანახმად, დაკორექტირებული ფასის (AP) ზრდადობით სორტირებული ლოტებიდან, ყველაზე დაბალი AP-ს მქონე ლოტების გამოვლენა/შერჩევა.

2. კონკურსის ჩატარების წესი

1. კონკურსი გამოცხადდება ერთდროულად სამინისტროს (www.mra.gov.ge) და სახელმწიფო შესყიდვების სააგენტოს (www.procurement.gov.ge) ოფიციალური ელექტრონული გვერდების საშუალებით.
2. მენაშენე, საკონკურსო წინადადების შემოტანით, ამავედროულად ადასტურებს თანხმობას კონკურსის პირობებზე.
3. მენაშენეს საკონკურსო წინადადება/ები შემოაქვს სამინისტროს ადმინისტრაციული დეპარტამენტის საქმისწარმოების სამმართველოში. (ქ. თბილისის, თამარაშვილის ქ. #15ა მისამართით), დალუქული კონვერტით, რის შესახებაც კანცელარიის დოკუმენტბრუნვის აღრიცხვის სისტემაში კეთდება შესაბამისი ჩანაწერი და მიენიჭება უნიკალური ნომერი. მენაშენეს შეუძლია, კონკურსის დასრულების ვადამდე ნებისმიერ დროს შემოიტანოს დამატებითი საბუთები დანართ 3-ში მითითებული ჩამონათვალიდან, და/ან დამატებითი საკონკურსო წინადადებები.
4. კონკურსის მიმდინარეობის პროცესში, დალუქული კონვერტები ინახება სამინისტროს ადმინისტრაციული დეპარტამენტის საქმისწარმოების სამმართველოში. კონკურსის დასრულების ვადის შემდგომ სამუშაო დღეს ყველა შემოსული საკონკურსო წინადადება

- გადაეცემა კომისიას, რომელიც ხსნის კონვერტებს და შეისწავლის ყველა წინადადებას წამოდგენილი დოკუმენტაციის სრულყოფილების კუთხით.
5. შესწავლის შედეგად დისკვალიფიცირებული საკონკურსო წინადადებები შემდგომ განხილვას არ ექვემდებარება. დისკვალიფიცირებული საკონკურსო წინადადებების დეტალები აისახება კომისიის სხდომის ოქმში.
 6. სრულყოფილი დოკუმენტაციის მქონე საკონკურსო წინადადებები გადაეცემა კომისიის სამდივნოს შესაბამის წარმომადგენელს, რომელიც კომისიის სხდომის მსვლელობის პროცესში, აწარმოებს დაკორექტირებული ფასის (AP) გამოთვლას ფორმულის თანახმად. საკონკურსო წინადადების განხილვის დასრულების შემდეგ, ხდება დაკორექტირებული ფასების (AP) ზრდადობის მიხედვით დალაგება.
 7. კომისია შემდგომი ეტაპისათვის ახდენს იმ ლოტების იდენტიფიცირებას, რომლებსაც აქვთ, დაკორექტირებული ფასის (AP) ყველაზე დაბალი მაჩვენებელი, და ახდენს შესაბამისი საკონკურსო წინადადებების ღირებულების (შემოთავაზებული ფასი x მთლიანი ლოტის საცხოვრებელი ფართი) დაჯამებას.
 8. კომისია უფლებამოსილია, შუალედური შედეგებით გამოვლენილ მენაშენე(ებ)ს მოსთხოვოს დამატებითი დოკუმენტაცია, რაც მოიცავს, შეზღუდვის გარეშე, ლ.სამხარაულის სახელობის სასამართლო ექსპერტიზის ეროვნული ბიუროს დასკვნას შენობის სტრუქტურული მდგრადობის შესახებ, შეტყობინებიდან გონივრულ ვადაში. საკონკურსო წინადადებებს, რომლებისთვისაც ტექნიკური მოთხოვნები არ იქნება დაკმაყოფილებული, მიენიჭება დისკვალიფიცირებულის სტატუსი.
 9. კომისიის მიერ დაზუსტებული საკონკურსო წინადადებ(ებ)ის განხილვის შემდეგ, საბოლოო შედეგები გამოცხადდება ერთდროულად სამინისტროს ოფიციალური ელექტრონული გვერდის (www.mra.gov.ge) და სახელმწიფო შესყიდვების სააგენტოს (www.procurement.gov.ge) ოფიციალური ელექტრონული გვერდების საშუალებით.
 10. გამარჯვებული მენაშენე(ებ)ი მიიღებენ სამინისტროს წერილობით დაპირებას ბინების შესყიდვის თაობაზე.

3. საკონკურსო პირობები და საცხოვრებელი ფართ(ებ)ის შესყიდვის ფორმები

1. კონკურსის გამოცხადების თარიღი განისაზღვრება 2014 წლის 30 დეკემბრით.
2. კონკურსის დასრულების ვადა განისაზღვრება 2015 წლის 31 იანვრით, 18.00 თბილისის დროით.
3. კონკურსი წარმოადგენს საქართველოს მთავრობის დადგენილება #638-ით (2014 წ. 28 ნოემბერი) დამტკიცებული პროგრამის მეორე ეტაპს. ამ კონკურსში მონაწილეობის კრიტერიუმებია:
 - 3.1. კონკურსის გამოცხადების თარიღისათვის ძალაში მყოფი / მოქმედი სამშენებლო ნებართვა;

- 3.2. საკონკურსო წინადადებაში წარმოდგენილი საცხოვრებელი ფართი განლაგებულია შემდეგ ქალაქებში: ბათუმი, ბორჯომი, გორი, ზუგდიდი, რუსთავი, ფოთი, ქუთაისი, წყალტუბო;
- 3.3. რეგიონებში განთავსებული ლოტების შესასყიდად მიმართული იქნება მთლიანი თანხის არაუმეტეს 25%-ისა (ოცდახუთი);
- 3.4. საცხოვრებელი ფართის ჩაბარების ბოლო ვადად განსაზღვრულია 2015 წლის 31 დეკემბერი.
4. სამინისტრო, საკონკურსო კომისიის გადაწყვეტილების საფუძველზე, გამარჯვებულ მენაშენეზე წერილობითი ფორმით გასცემს დაპირებას ან მასთან აფორმებს მომავალი უძრავი ქონების ნასყიდობის ხელშეკრულებას, დამთავრებულ და ექსპლუატაციაში მიღებულ შენობაში მენაშენის საკუთრებაში რეგისტრირებული საცხოვრებელი ფართის სამინისტროს მიერ შესყიდვის ვალდებულების უზრუნველსაყოფად.
5. ამ მუხლის მე-4 პუნქტით გათვალისწინებული დაპირება გაიცემა მენაშენის მიერ საკონკურსო წინადადებით შეთავაზებულ ვადებში სამუშაოების დასრულების პირობით. ვადის შეცვლის შემთხვევაში, თითოეული ობიექტის მიხედვით პროგრამაში მენაშენის მონაწილეობის და დაპირების მოქმედების გაგრძელების თაობაზე გადაწყვეტილებას მიიღებს კომისია.
6. პროგრამის მიზნებისათვის, საცხოვრებელი ფართის ნივთობრივ და უფლებრივ ნაკლში არ ჩაითვლება კრედიტის გამცემი ფინანსური ინსტიტუტის იპოთეკის უფლება საცხოვრებელ ფართზე, თუკი მენაშენე წარადგენს ფინანსური ინსტიტუტის მიერ წერილობით გაცემულ თანხმობას, ნასყიდობის ღირებულების ფინანსური ინსტიტუტის მიერ მითითებულ საბანკო ანგარიშზე ჩარიცხვის შემთხვევაში, მაქსიმუმ 5 (ხუთი) სამუშაო დღის განმავლობაში, საცხოვრებელ ფართზე იპოთეკის მოხსნის შესახებ.
7. სახელშეკრულებო ურთიერთობის ნებისმიერ ეტაპზე, მენაშენის მოთხოვნის შემთხვევაში, კომისია განიხილავს და იღებს გადაწყვეტილებას ნასყიდობის ღირებულების სრული ან ნაწილობრივი საავანსო ანაზღაურების საკითხის თაობაზე, მენაშენის მიერ შესაბამისი უპირობო, გამოუხმობი საბანკო გარანტიის წარდგენის საფუძველზე, რომლის ვადა 4 თვით უნდა აღემატებოდეს ნასყიდობის ხელშეკრულებით გათვალისწინებული ვალდებულებების შესრულების ვადას.

4. პროგრამის დაფინანსების წყაროები

პროგრამით გათვალისწინებული ღონისძიებების დაფინანსება განხორციელდება საქართველოს 2015 წლის სახელმწიფო ბიუჯეტიდან სამინისტროსათვის ამ მიზნით გამოყოფილი ასიგნებების ფარგლებში, დაახლოებით 16 (თექვსმეტი) მილიონი ლარის ოდენობით .

5. ინტერესთა კონფლიქტი

1. სამართლიანობის, მიუკერძოებლობისა და გამჭვირვალობის პრინციპებიდან გამომდინარე, კონკურსის ჩატარებასთან დაკავშირებული საქმიანობის განმახორციელებელი ნებისმიერი ფიზიკური პირი, რაც, შეზღუდვის გარეშე, მოიცავს კომისიისა და კომისიის სამდივნოს წევრებს, ასეთი საქმიანობის დაწყებამდე, ვალდებულია წერილობითი ფორმით განაცხადოს ინტერესთა კონფლიქტის არარსებობის შესახებ, დანართი 4-ში მითითებული ფორმით.
2. კონკურსის ჩატარებასთან დაკავშირებული საქმიანობის განმახორციელებელ პირს ექმნება ინტერესთა კონფლიქტი კონკურსის მონაწილესთან, თუ მათ შორის არსებობს საქართველოს საგადასახადო კოდექსის მე-19 მუხლით გათვალისწინებული ურთიერთობები.
3. თუ ამ მუხლის პ.1-ით განსაზღვრული პირი, კონკურსის მსვლელობის ნებისმიერ ეტაპზე, აღმოაჩენს ინტერესთა კონფლიქტის არსებობას, ვალდებულია დაუყოვნებლივ აცნობოს ამის შესახებ კომისიის თავმჯდომარეს, და ამ საკითხზე კომისიის საბოლოო გადაწყვეტილებამდე, თავი აარიდოს კომისიის მუშაობაში მონაწილეობის მიღებას.

6. კონკურსის შედეგების გასაჩივრება

მენაშენეს შეუძლია გაასაჩივროს კომისიის გადაწყვეტილება საქართველოს მოქმედი კანონმდებლობით დადგენილი წესით, კონკურსის საბოლოო შედეგების გამოცხადებიდან 1 (ერთი) თვის ვადაში.

დანართი 1. ფორმულა

საკონკუსო პირობებით მოგებული ლოტ(ებ)ის გამოვლენა ხდება შემდეგი ფორმულით:

$$Fv = Pv (1+i)^n$$

სადაც **Pv** არის კონკურსის მონაწილის მიერ შემოთავაზებული 1კვ.მ საცხოვრებელი ფართის ფასი (აშშ დოლარებში);

i არის საქართველოს ეროვნული ბანკის მიერ 2015 წლის 01 იანვრის მდგომარეობით განსაზღვრული საპროცენტო განაკვეთი;

n არის პერიოდი (წლებში) საკონკურსო პირობების გამოცხადების მომენტიდან, საცხოვრებელი ფართის სამინისტროსათვის ჩაბარებამდე;

Fv არის მომავალი ღირებულება, დათვლილი ფორმულის თანახმად;

AP არის დაკორექტირებული ფასი, რომელიც გამოითვლება პროგრამის პრიორიტეტებიდან გამომდინარე, შემდეგი წესით:

ა) საცხოვრებელი ფართის ენერგოდამზოგავი ტექნოლოგიებით აღჭურვის სტიმულირების მიზნით, $AP = Fv - \text{constanta}$, სადაც $\text{constanta}=10$ განისაზღვრა კომისიის გადაწყვეტილებით;

ბ) ყველა სხვა შემთხვევაში, $AP = Fv$.

დანართი 2. ტექნიკური მოთხოვნები საცხოვრებელი ფართის მიმართ

საცხოვრებელი ფართი უნდა აკმაყოფილებდეს შემდეგ ტექნიკური პირობებს:

1. შესასყიდი საცხოვრებელი ფართი უნდა იყოს საცხოვრებლად მზა მდგომარეობაში, არ უნდა საჭიროებდეს დამატებითი სარემონტო სამუშაოების ჩატარებას და საცხოვრებელი ფართების დიზაინი უნდა აკმაყოფილებდეს შემდეგ მინიმალურ მოთხოვნებს:

1.1. იატაკების მოპირკეთება:

ფოიე, საერთო ოთახი, საძილეები - ლამინატი;

სან.კვანძები, სამზარეულო - კერამიკული ფილები.

1.2. ჭერისა და კედლების მოპირკეთება:

სანკვანძები - კერამიკული ფილები, შეკიდული ჭერი;

სამზარეულო -კერამიკული ფილები ლოკალურად ხელსაბანებთან;

სხვა ოთახები - შეღებვა წყალემულსიის საღებავით.

- 1.3. კარ-ფანჯრები:
 - ლითონ-პლასტმასის ფანჯრები მინა-პაკეტით, სამზარეულოებში სარკმელებით ბუნებრივი ვენტილაციისათვის;
 - საცხოვრებელი ფართში შესასვლელი კარები - ლითონის;
 - საცხოვრებელი ფართების შიგნით ოთახებში შესასვლელი კარები - მ.დ.ფ.;
 - სან.კვანძებისა და აივნებზე გასასვლელი კარები - ლითონ-პლასტმასის.
- 1.4. სანტექნიკური მოწყობილობები:
 - სამზარეულო - სამრეცხაო ნიჟარა შემრევით;
 - სან.კვანძები - აბაჯანა ან შხაპის ქვესადგამი შხაპით, შემრევითა და სიფონით, უნიტაზი, ტრაპი, ხელსაბანი ნიჟარა შემრევით.
- 1.5. ელ.ტექნიკური მასალები:
 - სხვადასხვა ტიპის პლაფონები (სანათი, ჩამოსაკიდი);
 - ავტომატები, ამომრთველები და როზეტები - სამშენებლო ნორმების მიხედვით.
- 1.6. ვენტილაცია:
 - გამწოვი ვენტილატორები სააბაჯანოებსა და სამზარეულოებში.
- 1.7. ინდივიდუალური მრიცხველები:
 - დამონტაჟებული უნდა იყოს წყლის, ბუნებრივი აირისა და ელ.ენერჯის გარე ქსელებთან მიერთებული ინდივიდუალური მრიცხველები.
2. საცხოვრებელი ფართი შესყიდვის დროისათვის უნდა იყოს უფლებრივად და ნივთობრივად უნაკლო მენაშენის საკუთრება, რაც უნდა დადასტურდეს სსიპ საჯარო რეესტრის ეროვნული სააგენტოდან შესაბამისი ამონაწერით;
3. მრავალბინიანი საცხოვრებელი სახლი, საცხოვრებელი ფართის შესყიდვის დროისათვის, უნდა იყოს ექსპლუატაციაში მიღებული საქართველოს მოქმედი კანონმდებლობის შესაბამისად;
4. საცხოვრებელი ფართის საორიენტაციო ფართი უნდა იყოს:
 - ერთოთახიანი - 25,0 - 40,0 მ²
 - ორთახიანი - 45,0 - 60,0 მ²
 - სამოთახიანი - 65,0 - 80,0 მ²
 - ოთხთახიანი - 85,0 - 100,0 მ²(შენიშვნა: აივნების ფართი არ უნდა აღემატებოდეს საცხოვრებელი ფართის სასარგებლო ფართის 15%-ს. მოთხოვნილებიდან გამომდინარე, პრიორიტეტულად ითვლება 1 და 2-ოთახიანი საცხოვრებელი ფართების შესყიდვა.)

დანართი 3. საკვალიფიკაციო დოკუმენტები

შემდეგი დოკუმენტების პაკეტი წარმოადგენს საკონკურსო წინადადების განუყოფელ ნაწილს. არასრული და/ან ხარვეზიანი დოკუმენტაციის წარმოდგენა გამოიწვევს კონკურსის მონაწილის დისკვალიფიკაციას. დოკუმენტების ჩამონათვალი:

1. იურიდიული პირებისათვის:
 - 1.1. წესდების სანოტარო წესით დამოწმებული ასლი;
 - 1.2. ამონაწერი მეწარმეთა და არასამეწარმეო (არაკომერციული) იურიდიული პირების რეესტრიდან;
 - 1.3. უფლებამოსილი ორგანოს ან პირის გადაწყვეტილება პროგრამაში მონაწილეობის თანხმობის თაობაზე;
 - 1.4. ცნობა სსიპ საჯარო რეესტრის ეროვნული სააგენტოდან, რომ არ მიმდინარეობს იურიდიული პირის რეორგანიზაცია/ლიკვიდაცია;
 - 1.5. ცნობა სასამართლოდან იურიდიული პირის მიმართ გადახდისუუნარობის საქმის წარმოების შესახებ;
 - 1.6. ცნობა სსიპ საჯარო რეესტრის ეროვნული სააგენტოდან, იურიდიული პირის ქონებაზე საჯაროსამართლებრივი შეზღუდვის (ყადაღის) არარსებობის შესახებ.
2. ფიზიკური პირებისათვის:
 - 2.1 პირადობის დამადასტურებელი მოწმობის ასლი;
 - 2.2 ცნობა სსიპ საჯარო რეესტრის ეროვნული სააგენტოდან, ფიზიკური პირის ქონებაზე საჯაროსამართლებრივი შეზღუდვის (ყადაღის) არარსებობის შესახებ;
 - 2.3 საქართველოს იუსტიციის სამინისტროს მმართველობის სფეროში მოქმედი საჯარო სამართლის იურიდიული პირის - აღსრულების ეროვნული ბიუროს მიერ გაცემული ცნობა/ამონაწერი ფიზიკური პირის მოვალეთა რეესტრში რეგისტრაციის თაობაზე.
 - 2.4 ცნობა უფლებამოსილი ორგანოდან ნასამართლობის შესახებ, რომლითაც დასტურდება, რომ პირი არ არის ნასამართლევი სამეწარმეო ან სხვა ეკონომიკური საქმიანობისა და სამოხელეო დანაშაულისათვის;
3. კონკურსში მონაწილეობისათვის მენაშენის მიერ წარსადგენი დამატებითი დოკუმენტაცია:
 - 3.1 მოქმედი მშენებლობის ნებართვის ასლი და შესაბამისი სამშენებლო დოკუმენტაცია, იმ ასაშენებელი ცალკეული საცხოვრებელი ფართების მითითებით, რომლის შესასყიდადაც ხდება საკონკურსო წინადადების წარმოდგენა;
 - 3.2 მშენებლობის არსებული მდგომარეობის ამსახველი ფოტომასალა ბეჭდვითი და/ან ელექტრონული ფორმით (ჩაწერილი CD დისკზე);
 - 3.3 მშენებლობის დასასრულებლად აუცილებელი, დარჩენილი სამუშაოების ჩამონათვალი და ამ სამუშაოთა შესრულების კონკრეტული ვადები. სამუშაოების ჩამონათვალი უნდა გაიწეროს მშენებლობის ნებართვით განსაზღვრული ვადის გათვალისწინებით.

დანართი 4. ინტერესთა კონფლიქტი

ხელწერილი
ინტერესთა კონფლიქტის არარსებობის შესახებ

ქ. თბილისი

_____ 2014 წ.

„სახელმწიფო შესყიდვების შესახებ“ საქართველოს კანონის მე-8 მუხლის მოთხოვნების თანახმად, ქვემოაღნიშნული პირები ხელმოწერით ვადასტურებთ, რომ საქართველოს ოკუპირებული ტერიტორიებიდან იძულებით გადაადგილებულ პირთა, განსახლებისა და ლტოლვილთა სამინისტროს მიერ 2014 წლის _____ გამოცხადებულ კონკურსში ჩვენი მონაწილეობა არ იწვევს ინტერესთა კონფლიქტს.

უწყებათაშორისი კომისიის თავჯდომარე

უწყებათაშორისი კომისიის თავჯდომარის მოადგილე

უწყებათაშორისი კომისიის წევრები:
